

全
浙
詩
話

全浙詩話卷四十八

會稽陶元藻篁村輯

男

廷珍
廷琬

編次

仁和朱文藻映澹

參訂

同邑宗聖垣芥颿

國朝

厲鶚

鶚字太鴻號樊榭錢塘人康熙庚子舉人薦博

學宏詞

南宋院畫錄

厲鶚題楊妹子題馬和之小景二首六

飛當日駐錢塘曾畫毛詩馬侍郎五百年來遺墨盡秋
林曳杖見吳裝便媚小楷媚多姿似見楊家弄筆時南
渡已無文字禁宮闈也愛寫蘇詩

蓮坡詩話 錢塘厲太鴻徵君鶚以詩名海內者三十
年著有樊榭山房集十卷清徵孤峭於新城長水外自
樹一幟承學之士奉爲圭臬今年落燭日以手書詩筆
見貽內有紅橋春遊曲風調直偏元初其詞曰客愁當
春亂如絲挂在紅橋新柳枝主人官小肯愛客載酒呼
船浪汨汨孟婆跋扈作餘寒玉簫吹過曲闌干東陵飛
下三春鳥女兒破顏細窩小繁華瞥眼徒紛紜羊牛踏

穿阿糜墳隔江山映殘梅晚招之不來殊假寇主人勸
客爲樂方陳郎扣舷發老狂高子哦詩妙五字遊魚出
聽燈在水風花上已連清明有約更賦麗人行

雲獲齋詩話 厲徵君肆力於詩鏤心役賢句雕字琢
不泥古不趨今會衆美以萃其筆端吾鄉百年詩人中
殆難其匹性雅好遊所至搜剔名勝邀同二三故人山
顛水曲攬葛攀藤徘徊吟賞必盡興而後已集中西溪
諸什直抒胸臆可當山經讀也其五言如絡緯刁騷風
激響斷續雨兼悲靈隱寺夜月在衆翠頂泉流亂葉
中江漲橋簾捲橋南樹花飛水上樓晚步水光知月出

花落見風行月夜舟出北關野橋迎月直斷岸見烟生
秋夜雨中微雨宜幽鳥初涼健酒人理安寺巖翠多冷
光竹禽無驚啼春日泛舟遠水浮春市青山落晚睨看
梅晴雪一溪影白雲千嶂香七言如城北看菜花北郭
不來遊女賞東風多厲野人收元旦壽親無量須依佛
貧我何私莫問天病目戲成細字難拋工作果好花飽
看已過春閒居隣燈明處先穿樹山雨來時自打扉南
山岸痕倒樹生新水塔影留人戀夕陽觀音巖徑滑行
防和葉墜江清飯愛帶雲吞南湖草堂雨久蟻衣生壁
早夜涼螢火入簾遲泛湖香飛花片來杯面寒送東風

入塲腰移居繞墻細數遲生笋縛架親扶已卧花南湖
秋望橫塘秋水明菰葉老屋殘陽上蘇花皆佳句也所
著別有南宋院畫錄東城雜志若干卷有鈔本行世

趙 昱

昱字功千號谷林仁和人貢生與弟信同舉鴻
博著愛日堂吟藁

愛日堂吟藁 當歸八首自序云蜀志注姜維母在魏
寄以當歸維曰但有遠志不在當歸嗟乎伯約出身許
國不能兩顧以全其孝尚不爲君子所恕矧余家有七
旬老母羈跡於外身業復無所事謬刺實甚能不急作

歸計耶遂賦當歸八詩以行其中歷寓事親從兄課子
弟集友朋室家之聚書史之樂而終之以園圃歌事遂
情更胡不歸云當歸懷此陟親舍白雲邊弱線征衫惜
春暉游子憐久譏姜伯約歸頌傅延年更喜勞宣藥行
和問膳眠當歸有兄弟強半鬢毛斑詩酒頻連和園亭
樂往還七人安素業一老且休閒歸去春將莫棠花正
好攀當歸借婦隱老去更思歸萊子攜春畚桓公戀故
衣料量需藥餌歎息賦蚺蟻出處年來悞予心白首違
當歸課兒姪早晚愛庭趨阮氏賢誰似王家癖豈吾奇
文師犬子小字識於菟學殖兒曹在殷勤慰老夫當歸

弄孫子若箇似黃童甘味時分果新枝待長桐連翩三
竹馬老大一家翁歲月歡娛裏重扶綵戲同當歸尋舊
雨久約見平生琴疊山心解鷗申海野盟紀羣還下拜
環綬自聯情此道通風雅丁丁伐木聲當歸理素業家
有舊書巢暇日蒐藜脞平生媿五鈔夜燈昏細讀午枕
倦常拋癖此設憂物何須爲解嘲當歸樂園圃五畝足
幽居風木心無極詩書澤有餘淺梅春檻在舊竹晚寮
疏洗眼清華境塵埃萬斛祛

周京

京字西穆又字少穆號穆門錢唐國子生乾隆

丙辰舉鴻博不遇考授州同有无悔齋集

周穆門墓志

桑調元撰

君事親孝除夕考病思飴橘苦購

得之禱於神願減已壽益考翌日乃瘳中年南遊閩海
北燕西秦晉所歷名山大川墟莽古跡悲歌慷慨震宕
天地晚息影蓬廬共里中詩老結吟社策杖出西郭扁
舟草屨縱浪湖山間醉題酒樓壁好事競鈔詩買酒有
詩價爭如酒價高之句勝事足艷千古

南宋院畫錄

周京題馬和之畫雙龍小篆玉錢圖淡

墨香消五百年遙想署書楊妹子綠窗朱戶繡簾前洗
盡鉛華馬侍郎獨留綠筆帶宮黃鳳凰山下莓苔路露

井寒林幾夕陽

炙硯瑣談 錢塘周少穆同友人湖上句云野鷗導我
有閒意新柳笑人成老夫風趣可挹

國朝兩浙詩鈔 周穆門賦燕來詩云烟雨踈踈覆綠
苔海棠時節燕重來不辭故國三千里還認雕梁十二
回荒草誰家深院落繁華何處好池臺却憐舊館曾相
識爲把湘簾手自開賦楊花詩云南陌風光劇可憐楊
花撩亂撲鞦韆一年春事拋流水半醉心情付別筵冉
冉慣尋芳草岸濛濛欲下夕陽天殘紅同盡無消息又
化浮萍上釣船

汪 沆

沆字西灝號槐堂錢塘人由諸生薦舉鴻博

海嶼詩話 篁村陶丈初建泊鷗莊會賦詩四章吳越
人和者甚衆其詩有野老門庭雲亦嬾荷花世界夢俱
香之句一時傳誦槐堂傾倒尤甚贈以詩云想見夢香
雲嬾處北窗高卧傲羲皇

國朝兩浙詩鈔 汪槐堂嘗預修浙江通志有社日呈
志局諸公次樊榭先生韻云離合人生是水萍相於官
閣類巖扁風催花信初歸樹草接苔痕欲上廳爲乞治
龍傳社酒未妨破睡補山經先生自具編摩手要與家

江發秀靈

曹廷樞

廷樞字古謙嘉善人雍正癸卯副榜應試博學

鴻詞放歸

隨園詩話 嘉禾徵士曹廷樞古謙與葛卜元同教習

宗學葛北方人長於考據自負博雅而曹專工詞章二人不相能虞山蔣公滿洲世公各有所庇遂相參劾古人洛蜀之分皆由門下士起也曹詩中咏春雨一首絕佳云兩兩溪邊水鳥呼漸看簷際濕模糊憑闌花重紅疑滴隔座山橫翠欲無吟苦莫愁春冷淡病多偏穩睡

工夫卷簾自愛虛無景未要瀟湘入畫圖

陳士璠

士璠字魯章杭州人

隨園詩話 同試鴻博陳魯章士璠杭州人以諸生中式卽授庶常途中紀事云月映湖光分外明蘆花影裏一舟橫夜深聞有鄉音在曉起開篷問姓名

胡天游

天游字稚威號雲持山陰人浙江北直兩中副榜榜姓方乾隆丙辰舉鴻博

越風 雲持踈放不羈博極羣書下筆千言未嘗起草

生平所著經史論解古文詞賦甚富久困場屋後應博
學鴻詞試以嘔血污卷易而復污者再豈非命哉詩稿
久存燕京茲從流傳吾越者選錄若干首

畫漁餘話 胡徵君天游鴻都詩一聯云黃瓊不待遺
書出方朔寧因索米來其次句將東字截去或以爲本
諸明初詩人凌柘潭不知青牛到日迎方朔丹竈開時
其稚川其中唐沈傳師已截用之豈創自柘潭乎自梁
簡文帝至宋謝無逸以來凡詩家專咏蝴蝶者頗多而
專咏蜻蜓者絕少其殆因蝴蝶易工而蜻蜓難工歟近
見雲持居士集中有五排一首云長尾蹙香筒青頸刻

水葱迴身一華表翦翅兩難容小暑斜陽雨殘春遠岸
風偷眠香草碧淺立釣絲紅急舞烟河暖交飛露苑空
蓮塘朝暫醉蘋瀨晚全逢稚子驚團扇幽禽接午叢忘
機逐誰去上下海天東前四句已形肖至風紅兩韻則
神肖矣是真能爲其難者

按雲持胸有卷軸而筆又足以達之弱冠時爲文過
於典贍稽有士衡才多之病及抵京師後蘊釀愈深
全以瀛氣流行蒼莽無涯淡嘗自謂所作當在傅蓋
山方望溪李彥堂三人之上第恃才慢罵人多惡之
嘗薦經學爲當事者所抑不得上余在周青崖齋頭
見其詩鈔一本計一百五十餘首五言偏似少陵五
古純乎漢魏惟絕句非所長耳此皆越風所未載者
余曾勸其付梓行世雲持笑曰未能餽八口何暇鐫
五言蓋自傷其貧也余南歸不數載雲持已
作陳人未知此稿本其嗣君己盡開雖否

王霖

霖字雨楓號弇山山陰人康熙乙酉舉人乾隆
丙辰舉鴻博後官南宮今有弇山詩鈔

越風 王霖楊花詩纔看飛雪楊花似又見楊花似雪
飛總與白頭相映發可憐老眼只依稀亂隨行跡鋪苔
徑故傍吟身透薄幃念汝無情尚漂泊天涯羈宦幾時
歸黃唐堂詩不宜雨裏宜風裏未見開時見落時爲是
題正寫劉鳳岡詩乳燕池塘烟淡淡雛鶯庭院日遲遲
爲是題旁寫終不若查初白春如短夢初離影人在東
風正倚闌一語有不卽不離之妙

周西序

西序號青瑤蕭山人諸生乾隆元年應博學鴻
詞試至都門不能上竟潦倒而卒

詩衡 青瑤詩筆娟秀每日必作一詩功熟而句益工

題西施廟云誓死未酬亡國恨偷生肯上五湖船秋園
云秋林無靜葉寒水有沈魚又如曉行云馬馱殘夢過
江皋法相寺云山深寒月凍琉璃皆佳

按嘉興沈廉少年入秦曾有句云去題百二關中壁
要看三千里外山聞者壯之卽西序弱冠時登岱云
帝座仰窺纔尺五黃河下視直三千亦屬何等氣概
其後兩人俱不獲一第抑鬱終身然則世之以詩句
卜人榮枯者乃偶
中耳豈可全信哉

徐廷槐

廷槐字笠山會稽人康熙辛丑進士乾隆丙辰
舉鴻博

詩斷 笠山先生今古文爲世推重吾郡能文之士多出其門雖不以詩名然偶有所得輒饒清永余猶憶其
邨居詩云麥熟童催餅蠶眠婦守燈此等句尤真樸有
味

周大樞

大樞字元水山陰人由舉人官平湖教諭

詩斷 元水古詩以豪放爲主近體多華整惟酒醒燈

初暈人來夢未遙夕陽明晚稻秋水倒踈花二聯淡遠
清微殊不易得

羅世芳

世芳字蒼山號寶靖會稽人乾隆丙辰進士官
翰林庶吉士有學易軒詩稿

越風 蒼山爲武鼎元街水公幼子負才游俠以湘波
一詩擅名絕調深情一時有羅湘波之目少年館選尋
改邑令鬱鬱以歿

按湘波詩云湘波如淚絲迢迢海月初生夜聽潮誰
採芳馨贈下女一天秋影蕩蘭苔首二句寫得有聲
有色而情已見乎
詞固是神來之筆

岑兆松

兆松字春江餘姚人乾隆丙辰鄉試第一

越風 解元屢躋禮闈余嘗贈詩云秋榜才名標第一

本朝科甲重三元如何自聽霓裳後五度春風負杏

園上二句集唐寅解縉詩

按春江將進酒四首諷諭出以流利之筆似從香山海漫漫秦吉了諸篇尋消問息來再作波折當更佳

王秉和

秉和字公泰會稽人乾隆戊辰進士授翰林庶

常改刑部主事歷官衡永郴道

越風

公泰登蓬萊閣云岫然一閣閱滄桑島色濤聲

入畫廊如有宿緣思鬱鬱已成仙界坐茫茫孤帆險道
征人遠危磴磽田稗子香幸得蘇公章奏入何言觀象
括坤囊次韻答陶石湖云那得今生望賜環虛傳霧豹
見微斑景行蓬沼愁中色逸少蘭亭夢裏山無數仙樓
勾我住不多詩卷待君刪休嗟暮景蹉跎過留得名存
巖壑間誦二詩知作者清華舊感實有難忘

金德瑛

德瑛字汝白一字慕齋又號檜門仁和人乾隆
丙辰順天鄉舉貢禮部廷試第一授修撰累官

左都御史

紫竹山房文集 慕齋公裔出休寧甌山金氏性好古
下筆必力追作者工書法善鑒別金石摹本及古人手
蹟真贋乾隆元年由丙辰順天鄉貢禮部 廷試讀卷
大臣置公卷於第六 上特拔第一 授翰林院修撰自
是連充福建江南考官公故寄籍吾浙仁和辛酉冬乃
銜 命渡江復請假歸里留十許日羣從咸在於是遂
奠淚先塋張筵老屋並名同社父老會飲極歡時公意
以春秋方富似此天倫之樂當不止一再見於卽事留
別諸篇而二十年來往來南北竟未暇續舉蓋人生會
合時少其在宦途又加少間一有之多自謂草草未滿

意庸詎知未滿意之境卽其至少而不可再得者耶

文藻按吾鄉有兩金殿撰一曰金雨叔先生姓其一卽檜門先生也檜門先生自大魁來垂六十年而姓氏漸已湮沒讀其遺文者少矣所謂卽事留別諸篇泯不可得見微此文則後學幾不知先生之能詩者矣

史積琦

積琦字德璋會稽人乾隆丙辰進士官翰林院編修改河南道御史著有栗齋詩存

越風 丙辰之歲吾郡授館職者六人會賦六君咏紀登瀛之盛栗齋年最少簪筆之餘兼通治畧其在臺垣頗有風力昔北魏尚吏事以朝士蘊藉爲潦倒若栗齋

者是可以才人目之庚午卒於官余在京以詩哭之云
驄馬西臺成結局梨花左掖記同看至今宰木已拱檢
其遺稿尚有餘哀

陳經濟

經濟字綸生寧海人

三台詩錄 綸生有孤燕吟爲吳藥圃先生母葉太孺
人作也母年二十七而寡逾七十而歿其孀居時有孤
燕來巢梁上十餘年一時都人士咸謂太君至誠感物
相與賦詩志異天台陳南陔齊息園二先生序其事其
詩云故巢寂寞負春時影隻形單剩此雌窗掩一燈孤

睡早簾開雙翦獨歸遲烏衣國遠情誰寄燕子樓高節
共持爲感偏淒傳雅唱靡它並咏栢舟詩冷韻幽情呢
喃如訴 藥圃以亡婦素娘夢中十分清瘦在梅花之
句徧向親友請賦詩名作林立綸生有句云須信骨俱
隨雪冷更無香可借風聞最爲藥圃所賞附記於此

盧憲觀

憲觀字賓王仁和人乾隆丁巳進士由翰林至
山東按察使

雲獲齋詩話 賓王工詩其題易徵君廬墓圖曰霜露
淒清秋正陰仰園一望總蕭森白雲滿眼春暉盡喬木

難忘寸草心一幅丹青有所思不來燕市竟誰知傷心
淚與墳前土湘水悠悠無盡時寫孝子情詞悱惻可感
也觀察之祖閣學公琦字景韓號西寧熟於史事事親
以孝聞

錢琦

琦字湘人號瓊沙仁和人乾隆丁巳進士由翰
林累官福建布政使

隨園詩話 甬東顧鑑沙讀書伴梅草堂夢一嚴裝女
子來見曰妾月府侍書女與生有緣今奉勅齎書南海
生當偕行顧驚醒不解所謂後作官廣東於市上買得

葉小鸞小照宛如夢中人爲畫橫影圖索題錢湘人方伯有句云怪他才解吟詩句便是江城笛裏聲余按小鸞粵人笄年入道受戒於月朗大師佛法受戒者必先自陳平生過惡方許懺悔師問犯淫否曰徵歌愛唱求鳳曲展畫羞看浴圖犯口過否曰生怕泥污唾燕子爲憐花謝罵東風犯殺否曰曾呼小玉除花虱偶挂輕紈壞蝶衣 胡偉然釣臺云在昔披裘客浮名著意逃江流日趨下益見釣臺高錢湘人方伯釣臺云圖畫功名安在哉高風千古一漁臺此情惟有江潮解流到灘前便急回余過釣臺見石刻林立獨愛此二首

海墨詩鈔 錢方伯之祖禹侯客三河遇危機輒修治
人不遭溺今猶德之鍾峻堯明雲巖先生方伯之師也
方伯終身敬事之嘗題師照有詩云瘦骨崢嶸短髮疎
澄懷觀物意如如松撐遠勢青千尺石瀉清光綠一渠
山水之間尋有樂周秦以下讀無書十年憶坐春風好
願得圖中更着予

梁放心

放心初名詩南字首風後改今名字首存一字
葭林仁和籍錢塘人乾隆己未進士改庶吉士
紫竹山房文集 君幼警敏讀書過目能強記號爲奇

童初瀕江岸以居老屋數椽與同母弟文莊公自相師
友君詩文意境澄奩鬱遠不染纖埃而又如越人之醫
能隨俗爲變其受知於世者都非所稱意諸名公雖極
口稱歎實未知其深也

隨園詩話 梁文莊公之兄啟心字守存入翰林後卽
乞歸養其子山舟侍講亦早乞病使其弟敦書仕於朝
一門家風如此守存除夕約同人遊吳山不果乃寄詩
云何堪歲盡復遷延夙約都爲俗事牽多謝分吟留一
席不妨屬和待明年空山響答千門爆落日寒迷萬瓦
烟想見諸公高會處下方人指地行仙除夕云舊賜宮

袍聊一着新頒春帖懶重書晚過山菴云清依古佛原
無夢老笑秋蟲尚有絲

國朝兩浙詩鈔 葢林先生夜宿萬峯詩云我來南山
陁路出松筱下愛此秋半壁一榻從僧借露涼草蟲咽
覽密巖泉瀉遲月循虛廊湖影忽相射篝燈三五點認
是魚蟹舍禪棲本清絕况復涉深夜談空若有得參詩
轉無暇短夢向鐘聲晚色逗林罅

吳嗣富

嗣富字鄭公號崑田錢塘人乾隆己未進士授
翰林編修曾爲三省學政

海嶼詩話 崑田詩雪洗聰明塵氛脫盡篁村陶丈七
十初度崑田贈詩四絕云飄然詩境澹無痕問是泉明
幾葉孫我欲重編高士傳黃花籬落柳邊門書閣焚香
一事無玉簫聲裏小紅俱菟裘占得無多地不住西湖
卽鑑湖閒著蓑衣把釣綸葛翁嶺下老遺民癡錢不買
紅塵屋三百梅花是比隣臥以遊之宗少文笑余老矣
息勞筋詩人應接能多暇甘把湖山獨讓君

金 焜 金文淳

焜字赤泉錢塘人志章子領鄉薦官禮部司務
著有妙明書屋詩三卷

文淳字質孚焜弟乾隆己未進士官翰林出知

天津府

尊聞錄 江聲兩丈夫子俱稟家學能文能詩其長焜
字以寧學於余曾見其游清平山句云僧分古寺東西
隱人踏山雲一再來又楊柳青時夜雨多皆佳句也其
季文淳字質孚詩律稍遜其兄然好句疊出如燭分涼
艷然新月酒入踈香酌野梅細馬六橋人簇簇殘花孤
閣雨蕭蕭亂帆隨鳥沒孤塔入雲齊竹聲調活水烟影
壓空菴樹深歸鳥急山靜出雲遲負郭無田憂歲閏倚
閭有母怨歸遲俱雅飭耐人哦諷 以寧學於余蓋康

熙辛丑也其時有劉子文巖字青耜又金君雨叔姓亦
時時至齋中作文以寧自北上以來忽忽六載余門從
學者先後數十人如二君者尤爲繫懷 質孳登燕子
磯云濤聲寒夕照亭影落孤鴻絕壁疑陰雨虛堂肅暮
風句法亦佳又春痕如夢怯風尖恐非近日少年能道
此

萬光泰

光泰字循初號柘坡秀水人乾隆丙辰舉鴻博
後中辛酉舉人

詩衡

詩句用支干原屬游戲筆墨集中不可數見卽

偶用之亦不必支干定對支干也萬循初光泰三月三日陶然亭云修禊詩成過癸丑得朋占就利西南陽山懷人云別來經甲子客至說毛公深得箇中三昧

金姓

姓字雨叔仁和人乾隆壬戌進士第一人官至少宗伯

隨園詩話 杭州姚君思勤黃君湘圃吳君錫麟八九人同作新年百咏俱典雅而吳詩尤超門神云問爾侯門立能知深幾重倪經培云爵封萬戶外秩滿一年中姚咏拜年云履吉弓韉換催妝歲燭然勝常稱再四利

市乞團圓風菱云面目爲誰槁心腸到底甜黃咏爆竹
云買來還縮手畢竟讓人工面鬼云一半頭銜用幾重
顏甲生皆佳句也金雨叔宗伯爲題辭云回首辭家十
載餘舊鄉風土夢華胥卷中重認新年景却認初來占
籍居

鄭虎文

虎文字炳也號誠齋秀水人乾隆壬戌進士至
翰林院贊善

海嶼詩話 紅豆嶺南最多其色殷紅質堅如石形同
扁豆圓者尤佳篁邨陶丈在潮州時曾賦七律四首爲

粵人膾炙和者甚衆誠齋亦和四章云萬點相思萬劫
同斷腸人獨倚簾櫳偶迴倦眼看成碧欲寫閒愁賦比
紅記曲掌擎珠錯落埋憂身付骨玲瓏從教灑盡啼鵲
血散在枝頭泣曉風斗帳紅珠彼一時別來容易見來
遲西方秋老人初去南國春濃物有知樓外絳雲迷舊
夢窗前朱鳥啄空枝如何得傍金釵底方勝同心結絲
絲誰屑珊瑚綴碧條也隨桃雨怨風飄三生未化燒心
火半面渾遮暈頰潮繫得赤繩殊可合承來紺袖唾難
消蓮塘一自輕拋擲驚破鴛鴦夢裏蕉記取靈芸別後
身玉壺清淚血痕新傷心畧似燃於金繞宅何緣幻作

人一點紅宜留玉臂十分圓欲上櫻唇只嫌不及榴房
子空結團圓未了因瑯瑯綺麗不減溫李遺音

孫庭槐

庭槐字在階別字芥舟庭蘭弟雍正壬子科順
天舉人乾隆壬戌進士改庶吉士授編修歷外
任累官吉南贛寧道致仕

孫芥舟行狀 府君幼卽能詩從學厲樊榭先生嘗同
遊湖上詠楊花有句云水心寺裏長廊外不見花開只
見飛樊榭先生賞其韻致絕佳他日定以詩名後在詞
館數年著作甚富宦遊所至名山勝迹亦皆見諸吟咏

然隨手散棄遺篋所存僅什之二

翟灝

灝字晴江錢塘人乾隆乙丑進士官終金華教

授

海嶼詩話 晴江和董浦方鏡詩其別開生面矜標格
羞逐時趨掠景光一聯不言方而方字自在吳越風俗
自元日至初五日必向親朋家走賀謂之拜年會稽陶
山漁尊孟有拜年口號云競着新衣引隊行喜人相避
不相迎縱然不識題門簿也要沿門叫一聲可謂善道
俗情矣然又不若晴江云渾是舊時王謝燕一年一度

到君家更饒雅趣此二句乃前人現成語晴江襲用甚切

梁國治

國治字階平號瑤峯會稽人乾隆戊辰第一甲

一名進士官至大學士諡文定

海嶼詩話 文定嘗與篁邨陶丈同遊七星巖時杭堇浦太史先有詩傳粵陶丈賦詩紀遊示文定文定曰杭作似學老杜君作偏肖昌黎吾當乞靈謫仙矣遂亦製七古一篇其中如手招三辰引鳳凰銀河開流溢戶旁乘凌清氣臨洋洋仙風吹落花香等句瀟灑出塵直

覺供奉清才辦香未遠

王又曾

又曾字受銘號穀原秀水人乾隆辛未南巡
召試賜舉人補內閣中書甲戌進士官主事

菊坡詩話 穀原夢緣詩云把袖驚看清淚新酒闌香
燼倍關人君如華表歸來鶴我是昆明劫後塵絳蠟燈
前尋舊夢紫桐花下說殘春一彈指頃二生事只未消
磨現在身末二句大有解悟其自注云壬子初夏宿緣
谿莊夢一道士自稱白松居士贈余句云攜君入座愛
君才畧話三生庾信哀谿上小軒題夢緣那年春盡見

君來忽忽六年矣偶憶前塵感而賦此真乃夢中說夢也

吳鴻

鴻字頡雲號雲巖仁和人乾隆丁卯鄉試辛未殿試皆第一人官終翰林修撰

隨園詩話 吾鄉吳修撰鴻督學湖南壬午科湖南主試者爲嘉定錢公辛楣陝西王公偉人諸生出闈後各以闈卷呈吳吳所最賞者爲丁姓丁正心張德安石鴻翥陳聖清五人曰此五卷不售吾此後不復論文矣榜發日吳招客共飲使人走探俄而鈔榜來自第六名至

未只陳聖清一人吳旁皇莫釋未幾五魁報至則四生
已各冠其經如聯珠然吳大喜過望一時省下傳爲佳
話先是陳太常兆崙在都以書賀吳云今科楚南得人
必盛蓋預知吳錢王三公之能知文能拔士也吳首唱
一詩云天鼓喧傳昨夜聲大宮小徵盡含鳴當頭玉笋
排班出入眼珠光照乘明喜極轉添知己淚望深還慰
樹人情文昌此日欣連曜誰向西風訴不平一時和者
三十餘人後甲辰三月余遊匡廬丁君宰星子爲催夫
役作主人相與序述前事彼此慨然且曰正心管領廬
山七年來遊者先生一人耳

金玉音

玉音字子登號穆齋太平人

三台詩錄 穆齋篤學力行家萬山中未嘗出與物接
惟一二詩友數十里外郵筒時往來焉嘗作貧婦吟云
破屋撼風雨危牆半傾欹塵穢滿簷角壁上懸蛛絲嗟
此鳩形婦惻惻雙淚垂厨空乏升斗囊澀無分釐四隣
亦如此稱貸將焉之含羞且行乞腹枵步踟躕辛勤攜
兒女竟日艱一炊念彼官倉粟粒粒皆珠璣一粒不出
倉倉中齧鼠肥惻然仁者之言讀此不一動心者是鄒
有司也

周天度

天度字心羅一字讓谷號西謙仁和人乾隆壬申進士宰清宛縣入爲主事出知許州有十誦

齋集

畫漁餘話 周讓谷未達時刑體已豐碩而性又劇喜遊山嘗同沈惕菴遊九華方近半霄亭數從人掖之始得上自吟曰僕懶童嗔余亦倦天風扶上半霄亭及遙望天臺路尤險仄益股慄不能登復作五言以謝同行者其後二韻云我身如馳驅我行如殺癩采風夫何能甘作退飛鷁予評其旁云麻姑大鵬無從爲先生借覓

幸而轉身得早否則又成韓吏部登華山故事耳 南
唐時陳沅譏害肉先生云傳語麻姑借大鵬

錢載

載字坤一號穉石秀水人乾隆癸酉進士官至
禮部侍郎

海嶼詩話 穉石考具詩不獨善摹物狀能使用物之
人亦有聲有色題有十首今錄其五柳筐詩藤竹南鄉
慣京師柳織成鳳饑心總繫魚貫手頻更細孔先披露
中腰自積羸愁他堤畔折供給到書生卷袋詩官紙收
惟謹郵筒成頗便胸開行或挂壁掃坐方懸抱玉寧無

淚藏珠信有淵若論功第一歲事賴君專號板詩雜取
松杉片安來几榻如分難容客座併卽作樓居尺寸裁
量爾高低位置余相憑成一笑豈有萬言書黃油簾詩
絕少扉雙扇聊障布一層油支雨脚亂黃愛日華澄燭
給懸俱定鷄鳴卷乍勝最憐更漏急映照面如僧矮凳
詩制類農莊具官爲試院輸差容憩芒屨實藉頓風爐
用亦隨高下材終論有無乘閒方露坐莫訝漢侏儒

李汪度

汪度字寶幢錢塘人乾隆丁丑進士官翰林

湖墅詩鈔 岳州守孫介亭有辭世詩云一死便埋三

尺土再生仍讀數行書寶幢讀之有感次韻云紫府依然鶴馭回雲旌繚繚鶴徘徊徒聞客坐司空塚不見神歸許氏臺料量死生同野馬破除得失笑亡杯一聯遺句高千古未比昆明劫後灰同時作者張柳漁湄云一死便埋三尺土如君猶有未埋名方伯錢嶼沙琦云宇宙滄桑留碩果江湖歲月老詩篇洛陽宰駱南宮志适亦有湖海人豪獨數翁之句

沈中柱

中柱字石臣號摩青平湖人乾隆庚辰進士吉水縣晚年爲僧有懷水菴詩草

國朝兩浙詩鈔 沈石臣口吃於書無不讀尤好管韓
故爲文雄深浩瀚卓然成家爲令擢廉卓及爲僧名行
然號無諍往來靈隱金粟間嘗賦落花詩云江南花信
早春色自融融嫩蕊曛晴藹柔枝怯晚風屢驚採雪白
翻訝點妝紅經眼愁看盡傳杯慎莫空昨宵風雨過花
事委溪涯飄泊渾無跡低徊獨繫懷丹心已盡吐幽韻
在誰諧濁酒澆荒圃殘香亦自佳

秦錫淳

錫淳字沐雲臨海人由舉人爲縣令

海嶼詩話 天柱寺僧菽舟好文墨嘗問人云天柱峯

真龜得到天否時臨海秦沐雲天台陳咫亭齊息園俱在
坐陳云雲低天就柱齊云月上柱擎天沐雲則云一柱
功成後高天賴不傾荻舟稱三公所言各有禪意予竊
謂齊不如陳陳又不如秦語有氣岸非錚錚細響可比
王世芳

世芳字徽德臨海人由遂昌訓導授國子監司
業累加侍講人以王壽星稱之

隨園詩話 浙中遂昌教諭王世芳字芝圃年一百十
歲入都慶祝 賜翰林侍講銜還鄉陳太常星齋贈詩
云華皓何來雲水頭寵加新秩返扁舟酒錢未卜憑誰

與壺藥翻叨爲我投薄官夢驚山北檄散仙行逐海東
鷗獨留佳話傳臺閣曾與耆英大父遊芝圃面長尺許
腰若植鰭自言少居鄉遭耿逆之變與諸妹豆棚閒坐
一妹頭忽不見蓋爲飛砲擊去也與第三子同來白髮
飄蕭背轉偃僂問其長子曰不幸夭亡矣問夭亡之年
曰八十五歲

柳崖外編 徽德先生生於順治己亥九月九日寅時
庚寅在都時不扶杖藜顏面止如六十許人耳微重而
能聽不借鏡而能作楷徒步十數里一蹴而至每食肉
二斤許餽饌之屬亦視中人有加人傳王壽星中年入

天台山有人授水二瓢一冷一熱壽星飲熱者意得胡麻瓊漿之美與台人又言壽星嘗見大魚暴於陸取而投諸水斯須雲霧晦暝化龍而去又嘗夜行大橋俯視有物龐然伏其下壽星下橋摩之牛也纔迴數武一虎突出吼躍去竟無牛吾曾以三事質壽星壽星笑不答其語人則曰吾生平無他過人視聲色貨利淡而已矣吁此其所以爲壽與雍正朝有浙江湯雲山壽一百四十六歲當百歲時猶能御女生子王壽星殆繼之矣

按南亭之祖應霸當康熙丙辰耿逆僞將曾養性圍台州從貝子征討被害軍前南亭因隨父永沂率兵血戰斬寇數十人適貝子遽卒未及奏功議叙逮囚十九歲始補弟子員官遂昌司訓乾隆辛巳蒙恩

晉階六品庚寅又荷宸章褒錫時年已百十有二
歲矣當年屆七旬孫曾已盛逮百齡外曾孫復舉曾
孫南亭大喜遂有身歷四朝沾浩蕩眼看七代長兒
孫之句蓋道其實也余三十年前曾客湖州見一老
者年一百十六歲長身鶴立骨相清癯其家素封自
宦遊歸里極園亭觴咏之樂凡遇邑宰生辰紳士入
賀必以此翁爲先導行不扶杖升階讓座宛若盛年
官民並以爲榮惟膝前至元孫而止不如南亭之眼
見七代然精神矍鑠實足旗鼓相當惜忘其
姓氏姑附識於此以見聖朝人瑞之多云

陳兆嶠

兆嶠字闓風錢塘人句山弟雍正己酉舉人官

中書舍人

紫竹山房詩集 闓風途中却寄有文章說有江山助

貧病終憐棗萼隨之句末云春城馬首愁千斛莫怪楊

花細細吹此語豈僕所忍聞耶依韻酬之云紛紛誰識
處囊錐挈挈常輦對案眉緩轡每貪詩有料病行偏厭
影相隨眼昏殘燭燒孤夢腸斷飛花記別期幸得登峯
遇迴雁捫空手跡落斜吹

文藻按紫竹山房詩卽閩風之兄句山太僕所作太僕自序簪毫錄云庚申辛酉間家弟兆嶠暴得心疾纏綿二年幾致不起余爲料理藥裏晨夕若語相對殊無意爲詩而弟又耽吟太過尤不敢以此事觸撥之云云此詩蓋閩風病少愈自京旋里途中寄詩而太僕和之也閩風詩不多見錄此以見一斑

朱笠亭

笠亭秀水人由舉人授阜平知縣有笠亭詩集

十二卷

笠亭詩集

楓江集
自序

余總角讀書家塾見有作詩者輒

喜效之顧未辨詩之源流也不敢多作作亦不敢存可
記憶者如烟暝和潮落城寒帶月圍長鏡雲外嶺短遂
雨中槎柳外千帆雨花前一桁山蒹葭影瘦纖纖月絡
緯聲高瑟瑟風人定流螢明曲徑夜深桂露濕空庭數
聯而已

按笠亭工詩尤精繪事俱以淡遠爲宗余嘗仿王叔
明溪山蕭寺寫小幅贈笠亭笠亭嘆賞不已謂深得
古人神髓遂亦畫山水一紙寄余并題其上云曙色
在窗帷衾坐帷忽得句云疎雨滴殘夢晨窗暗燭花
飛鴻響遠渚沈想落天涯昔人稱五言絕句如維摩
丈室須容得八萬四千獅子座此境最難工因作尺
幅摹意又不能盡正之

笠郵當有以教吾也

諸錦

錦字襄七秀水人

隨園詩話 陸陸堂諸襄七汪韓門三太史經學淵深而詩多澀悶所謂學人之詩讀之令人不歡或誦諸詩秋草馴龍種春羅狎雉媒九秋易灑登高淚百戰重經廣武場差爲可誦他作不能稱是

馬太青 王石父

太青山陰人官費縣令

石父山陰人爲壽州牧

柳亭詩話

馬太青王石父少與余同研席酬唱頗多

馬自費縣解組歸以詩見贈有曰編成黃葉衣偏冷賦就梅花夢亦清上句爲余寫照因是九歌中語下句用先廣平事則何敢當王爲壽州牧中讒去嘗賦詩曰若耶溪畔是儂家儂愛清溪日浣紗自恨生平多薄命門前故意不栽花王以烏衣世胄屢典名邦歸而僦屋以居炊烟屢斷亦可傷已

符 曾

曾字幼魯號藥林錢塘人由保舉官郎中有春鳥小稿

蓮坡詩話 錢塘符藥林曾著有春鳥小稿及賞花菊

屋雪泥鴻爪等集流傳南北其歲晚詩云橫陳斐几蜃
窗前看裊茶烟落鬢邊檢置故書閒竟日不妨叉手過
殘年又歸自橫塘云浮石環溪水半篙綠鱗鱗動散魚
苗歸來滿地夕陽影知了一聲鳴柳梢其神韻不減姜
堯章

隨園詩話 杭州符郎中名曾字勿魯詩主高淡嵇相
國爲余誦其三日不來秋滿地蟲聲如雨落空山一聯
余同 名試記其齋宮云寒雲添暝色老屋聚秋聲味
唐花云當時不藉吹噓力少待陽和也自開吳揚州馬
秋玉云心死便爲大自在蒐歸仍返小玲瓏小玲瓏山

館者馬氏花園也屬對甚巧賀周石帆學士納妾云藥
爐經卷多拋却只向燈前喚夜深尤蘊藉

楊汝楸

汝楸字工求仁和人官肅州知州

雲獲齋詩話 工求佳家栖水一眉微有青色因自號
曰青眉曾賦盛京竹枝詞有分明夫婿當門坐不待相
扶下馬來之句傳誦人口

李焯

焯字君頴東陽人貢生官杭州教授遷金鄉尹
有燕遊草

朱梅麓燕遊草序 讀弔古諸篇習習風生兩腋雖時
苦炎蒸恍如坐我於清冷之淵因有鑑湖未向金門乞
一幅桃源路可通之句贈之李子向任遂安家傳翼經
二刻可稱先聖功臣詩特緒餘耳

宋樹穀

樹穀字笠田號雪園錢塘人

隨園詩話 笠田詩如立秋東顧孝廉云前宵白雨昨
清風燥石炎威轉眼空萬竅商聲先蟋蟀一年落葉又
梧桐花開涼夜香偏久吟入秋來句易工爲報湖頭二
三子好修遊屐理詩筒獨步淨業湖云風吹堤柳綠斜

斜淨業湖波亂似麻京國清明初斷雪故園二月已飛
花青帘易買三升酒白乳空思七椀茶日暮一行飛雁
落知渠曾否過吾家山村少步云如此春光不自持寬
鞋短策步來遲得時花柳有衫色入畫雲山無定姿佳
節放閒村學散豐年預兆老農知日斜碧水橋頭坐何
處餽簫向客吹出京留別云六年燕市聚遊踪酒席歌
場處處同一夕西風人去遠便從天上望諸公對月云
桂花庭院晚風輕簾捲西窗看月生只費一鉤懸樹杪
已教秋思滿江城盆梅云數枝也復影橫斜惹得鬪人
鄉夢賒拋却西谿千樹雪瓦盆三尺看梅花山塘閒步

云踈狂猶記少年時幾處歌場鬥雪詩今日舊遊零落
盡酒痕只有故衫知似此風光絕可憐相攜朋好踏春
烟怪他楊柳舒青眼只向長街看少年紅花埤題壁云
六年京國夢江城此是江南第一程爲算還家多少事
昨宵枕上聽三更林處士墓云巖居尚恨雲常出世事
惟餘詩未刪僧舍云新花倚石儼相待古佛候門如欲
迎近郊小飲云風吹池水干何事人映桃花憶此門諸
作俱琅琅可誦

邵大業

大業字厚菴山陰人

隨園詩話 山陰邵太守大業字厚菴治蘇有惠政以忤大府罷官有口號一聯云江山見慣新詩少世味嘗深感慨多又老來兒女費周旋七字亦頗是人情

潘汝誠

汝誠字立亭湖州人

隨園詩話 湖州潘進士立亭名汝誠詩宗韓杜五古尤佳偶成云靜士難爲介靜女難爲媒嫁容靜女醜交面靜士羞盛年易晚晚獨抱無驛郵桃李非我春蒲柳非我秋鶴老心萬里鵬怒翼九州未免笑攀援豈屑伍喧啾慘春潤章句摘卉膏吟哦非無蘭茗玩風騷旨已

譌詩濤與詩骨韓孟兩嵯峨昆體逮鐵體滔滔同一波
金天削秀華碧海鳴神蠶義色少姚佚古詞無滯顏衰
中南風手請爲南風歌寥寥發古響羯鼓如予何潘宰
直隸某縣以迂緩故幾被劾矣適傅忠勇公平金川歸
潘獻饒歌公大誇賞乃改爲卓薦

全浙詩話卷四十八終